

浙江文叢

王世貞集

浙江出版聯合集團
浙江古籍出版社

浙江文叢

商盤集

〔第三冊〕

〔清〕商 盤 著 郭 楊 點校

浙江出版聯合集團
浙江古籍出版社

質園詩集卷二十六

初夏赴桂林

萍蓬無定粵東西，木馬船名舟輕襍被攜。荔子早逢三月熟，桂林遙覓一枝栖。蹉跎始悔人謀拙，繚繞難將物論齊。唯有懷南諳世路，綠榕深處盡情啼。

擘荔

平生慕荔支，輕紅實嘉果。譬聞江瑤美，垂涎想顚朵。首夏赴炎方，作策皆云左。剖柑已過時，浮瓜猶未可。賴此宋家香，早熟知爲我。粵俗嗜檳榔，紛將蔓葉裹。何如白玉肌，堆盤殊婀娜。惜無纖手擘，徒供饞口哆。嶺南居不惡，去留勞揣忖^(一)。飽噉笑蘇公，寧須三百顆。校勘記

〔一〕『揣忖』，原作『忖揣』，據韻乙正。

聞道

聞道丁零萬里遙，天威早已震天驕。九門轉戰勞光弼，五路分兵制曩霄。苜蓿蒲萄栽上

苑，朱干玉戚舞中朝。貞珉重勒平夸頌，舊績新猷兩不消。

紫濛赤狄漸生春，玉帳牙旗不動塵。閩外受降如禦敵，軍中輓粟不勞民。伏波亂已平蠻女，回紇占當見大人。從古安邊爲善策，始知任尚是庸臣。

廣運如天撒網羅，癰疽曾不點山河。鬼方豈待三年克，蠻長猶嫌七縱多。虎旅春回朝放馬，龍堆日落晚鳴駝。從臣簪筆皆才俊，雅樂應添奏凱歌。

楊柳歸期指顧中，雲臺高築待論功。張良帷幄能扶漢，魏絳鐘鏞在服戎。共識軍機由廟算，要令荒徼被華風。重煩師古圖王會，漆樹金山九譯通。

自梧赴桂水逆灘高舟行甚緩

梧桂奔湍似吉虔，修途利鈍總由天。已驚萬鼓千鐘後，況近炎雲毒霧邊。仙客乘查難得路，神人驅石竟無鞭。玉簫吹落如鉤月，不遣魚龍自在眠。

太極灘

挂席辭蒼梧，逆流赴平樂。水從龍口灘名噴，石類犬牙錯。茲灘錫嘉名，旋轉通冥漠。胚胎品彙分，闔闔陰陽薄。世無濂溪老，圖說誰能作？一葉浮三江，相對徒眙愕。麥芒風正厲，桃花漲初落。百頃吠琉璣，參差露圭角。多生本劬勞，險夷隨所托。剛柔爭盪摩，動靜互磅

礪。難逃爐冶鎔，欲啟乾坤橐。觀化悟先天，此行殊不惡。

昭平舊礪臺歌

昭平邑小不成邑，旁有高臺危岌岌。舊戌年深鼓角消，荒城世泰干戈戢。激石發機誰所造，坐守兼長利用礪。白晝俄看列缺來，紅彝特錫將軍號。行師上策惟火攻，摧殘壁壘焚臙臙。前朝子母無遺響，留此頽垣荆棘中。憶昔分符京口住，十三門峙風雲護。閱武閒將雉堞凭，舒文大得江山助。我今遲暮奈愁何，百粵登臨攬勝多。下瀨樓船久寥寂，伏波銅柱久嵯峨。人生有情增太息，南望江流浩無極。擊櫓聲低蛩夜吟，一丸月墮空林黑。

雨後放舟赴陽朔

觸熱兼旬與願違，蒲葵在手應時揮。雨交小滿多多善，灘過昭潭漸漸稀。萬樹曉聲鶗鴂語，半帆風色鷺鷥磯地名。捕蛇驅鱷前因在，泛宅蠻江作計非。

次答查儉堂雨中過訪之什

兩萍浮海忽重逢，蠻雨多情此夜濃。遲暮每勞良友惜，迂疎深荷上官容。栽桑拔薤知何地，泊鳳飄鸞失舊踪。明日伏波巖畔過，新詩題徧碧芙蓉。

題黃忠節龍溪祠堂圖并序

宋黃涪翁遷謫宜州，明刺史張丹霞建祠於龍溪上，查君儉堂贊郡，葺而新之。立碣繪圖，海內名流賦詩盈卷，勝舉也。乙亥初夏，握手建陵，出是冊索題。時有鬱林之行，江舸暫停，率成二律以應。

帶水如龍繞鎮城，鼓祠猶識宋賢名。黃鸝碧草春將暮，紅袖烏絲幟未成。絕代張秦酬倡侶，同時俞蔣死生情。南樓風月依然好，范傳重書氣不平。

魅魍天末瘴雲愁，一瓣濃香歷劫留。俎豆忽新賢太守，溪山遙指古宜州。黨魁有籍投荒老，信史何人秉筆修。我最善懷君好事，寶華亭畔約同游。

與家太守乾峰先生出郭望灘江

碧流如玦繞城邊，湘北灘南萬頃連。仙洞至今留水月，將軍無復下戈船。狙獠風俗何曾陋，顏延之孔戣聲名自可傳。共上逍遙樓上坐，皇恩應許住三年。

粵西勸農詞

炎土多荒重課畊，節交芒種雨初晴。元戎小隊乘晴出，白叟黃童夾路迎。

百粵三農異楚吳，孔戣惠澤古今無。稔年戶戶輸將早，不用中丞免歲逋。
村民游惰廢田功，但取豚蹄祝歲豐。米價定知從此賤，斗河南北賈船通。
社酒秧歌處處宜，乍逢官長似神祇。金花燦爛銀牌重，蠻語傖僇謝賞時。

經靖藩舊城

高皇起布衣，耆定膺大統。建國首天潢，從孫本龍種。寶玉魯侯藏，桐圭唐叔捧。遐哉百
粵區，藩封權實重。樓殿鬱嵯峨，峰巒翠環拱。彈指明社遷，繚垣變邱壠。當年歌舞場，滿目
荆棘擁。梁苑羅賓客，淮南煉丹汞。生無夾輔勳，存亡輕蟻蠊。鐘鼓任銷沈，鶯花委埽塢。唯
留獨秀峰，依然霄漢聳。

登劉仙巖

辰山高插天，灘水清環郭。蠻鄉山水奇，熊魚愛何博。此嶂亘東南，仙客曾栖托。深林有
蛻蟬，華表無歸鶴。寂寞古時春，瑤花幾開落。雲霞朝暮生，卷舒長在握。亭亭萬芙蓉，映日
成金萼。營邱與河陽，放筆安能作？我攜九節節，勝槩存巖壑。誰言百粵荒，亦藉五丁鑿。
何處風泠然，披襟倚高閣。巖上有泠然閣。

從棲霞寺至龍隱洞

曉出城東門，微雨作還止。洗將巖岫青，烟鬢臨鏡理。內有古洞天，未入心先喜。陰陽元氣含，窟宅仙踪徙。勝賞逢意外，搜秘出泥滓。咫尺龍隱崖，勢如三峽水。驚動抱珠眠，摩空掉其尾。誰唱步虛謠，西天暮霞紫。

七星巖

七峰如七星，炯炯懸北斗。成象與成形，爲奇不爲偶。酒漿挹未宜，橫轉機難剖。散落建陵東，碧色歸吾手。唐代奉玄元，立祠歲月久。古壁失龍蛇，殘碑斷蝌蚪。訪道萬山中，探奇千載後。仰視影闌干，急將塵抖擻。絕頂可能凌，迷途問樵叟。

粵西諸山萬貌千姿神剏鬼削皆拔地而起高插雲霄生平歷游吳楚所未見也

帶水重重束，冠巖山名整整增。祖龍驅不盡，神禹鑿何曾。鸞鶴群遊戲，雲霞氣蔚蒸。笑他吳道子，祇解畫嘉陵。

吳楚多清賞，茲游更壯哉。攜家行萬里，特爲看山來。壺嶠仙靈秘，乾坤鎖鑰開。登臨思

作賦，愧少揆天才。

鷓鴣謠

山深樹老曉雲白，中有鷓鴣聲格格。越王一逝賸荒臺，年年飛去還飛來。蠻鄉雖遠少荆棘，坦道誰言行不得？鷓鴣鷓鴣爾勿啼，人在五嶺三江西。

楊妃井歌

范陽戰鼓邊塵起^{〔一〕}，雨濕梨花葬妃子。元琰當年掌上珍^{〔二〕}，生長容州普寧里。戚畹銷亡歷劫沙，行人猶自訪楊家。傾城麗質歸宮禁，隔代遺踪汲井華。兄姊一門皆列戟，宅旁方斃寒流碧。真同禍水蓄昭陽，幾見恩膏沾太液^{〔三〕}。冷落延秋啼夜烏，倉皇萬乘赴成都。金餅百味君王薦，愁聽深宵響輓轡^{〔四〕}。臨春張孔顏如玉，燕支紅淚南朝辱^{〔五〕}。此井炎雲瘴霧中，古波不動蝦蟆伏。君不見，梁家鬻女珠盈斛，墜樓不惜埋金谷。一勺泉留雙角山，萋萋蠻草含情綠。綠珠井在博白縣雙角山下。

校勘記

〔一〕『戰鼓』，金武祥《粟香三筆》卷八引作『鼙鼓』。

〔二〕『元琰』，金武祥《粟香三筆》卷八引作『楊氏』。

〔三〕『恩膏』，金武祥《粟香三筆》卷八引作『恩波』。

〔四〕『愁聽』，金武祥《粟香三筆》卷八引作『怕聽』。

〔五〕『紅淚』，金武祥《粟香三筆》卷八引作『血淚』。

鐔 江

鐔水勢建平聲瓠，溶溶瀉未停。唾餘無淨綠，吟罷得空青。信美非吾土，將衰此乍經。流杯橋下客，宜醉亦宜醒。

咏 鳩

鳩性從來拙，誰知巧有餘。幾曾鷹眼變，長得雀巢居。拂羽群先集，呼晴驗亦虛。鳳鸞方繞樹，三匝待何如？

天門關

跌蕩生呼吸，天門路可通。日懸南極峻，水到北流窮。問俗知矜狃，看山並華嵩。鷗鷯如勸客，聲出翠微中。

下車鬱州

寶圭路接綉江亭，意外分符此暫經。雨過石袍山更翠，烟銷春瘴草猶青。捕蛇有說應寬賦，養鰓無池要省刑。聞道前賢多異政，千秋劉劉外谷谷永播芳馨。

廉石篇并序

陸公紀廉石一具^(一)，已載回姑蘇，置諸郡庠，曩曾見之。今權是州^(二)，石去名存，追憶賦此。

昔游吳郡庠，曾睹陸公石。漢代去今遙，一卷存舊蹟。古人勵貞操，束身等圭璧。棄硯與沈香，高風垂簡策。樂天取支琴^(三)，猶恐傷清白。元章時置袖，頗遭上官斥。茲石得廉名，載歸年代易。無用材自良，不落果長碩^(四)。蕭蕭臨頓里，介介鬱林客。峨峨太守祠，穆穆丞相宅。摩挲十載餘^(五)，忽作斯州伯。峴首訪殘碑，桐鄉溯遺澤。暮眺賞心亭，松篁起寒色^(六)。

校勘記

〔一〕《（光緒）鬱林州志》卷二十《藝文·詩》引此詩，『紀』後有小字『續』。

〔二〕『州』，《（光緒）鬱林州志》卷二十《藝文·詩》引作『邦』。

〔三〕『琴』，《（光緒）鬱林州志》卷二十《藝文·詩》引作『棐』。

〔四〕《（光緒）鬱林州志》卷二十《藝文·詩》所引此句下尚有『平泉聚奇觀，到眼堪一擲』兩句。

〔五〕『十載餘』，《（光緒）鬱林州志》卷二十《藝文·詩》引作『千餘載』。

〔六〕《（光緒）鬱林州志》卷二十《藝文·詩》所引此句下尚有『再拜景先賢，飲茹當冰蘂』。

尋萬花臺遺址

坐嘯山城意不凡，萬花臺似萬花巖。曩領海州，有《萬花巖》詩。兔葵古道無人問，燕子殘春有怨嫌。百歲休教多病度，一州且喜少官監。何時選勝題名徧，自向懸崖峭壁覓。

鬱州紀風〔一〕

拄笏朝來望大容，山名賞心亭外翠微重。州治城西舊有賞心亭。綠榕樹古長宜夏，城北豸堂嶺榕樹四本，可蔭十畝。藍靛陰繁直到冬。興業一邑多種藍。世泰與民同樂利，地偏於我稱疎慵。宦情何似雲林畫〔二〕，楚楚烟嵐總不濃〔三〕。

省俗拏帷到四廂，鄉廂有四分四十圖。愧無霖雨潤蠻方〔四〕。濯纓泉瑞春凝紫〔五〕，濯纓泉在城南，嘉定間忽湧紫水，更名瑞泉。挂榜山橫晚送黃。挂榜山在城東北。喜見沿村勤誦讀，還聞舊習改獠狼。豐年五月輸糧早，戶戶家家足蓋藏。

潤繞峰圍路略經，闌風伏雨氣冥冥。蚺蛇有膽身難護，蚺蛇膽名護身膽。翡翠無毛貢已停。久罷翠羽之貢。拔薤長官初入境，執禾埜老不登廷。納涼支枕難成寐，近砌蛩聲徹夜聽。

平楚蒼蒼一望收，關梁控扼重咽喉。綠珠江曲遙通海，博邑綠珠江，經廉州入海。黃橘山寒早得秋。寒山在城西，《九域志》云：南越王夏日遣人採橘，云山中大寒。牛女星躔聯北界，^{〔六〕}《州志·分野考》：鬱林爲翼軫之南界，牛女之北界。宋元郡治廢南流。舊治在南流，今廢。八營烽燧全消滅，閒倚當年鼓角樓。宋陶弼有《鼓角樓》詩。

荒亭殘碣草蒙茸，景陸思江舊跡空。景陸堂爲太守陸績建，思江亭爲知州江龍建，今皆圯。佳傳可曾垂信史，前賢畢竟有清風。西疇禾穗時時長，南國棠陰處處同。劉勔叢祠蕭勃壘，一般寥落夕陽中。宋劉勔、梁蕭勃皆茲州名臣。

月暈城圍撼麗譙，李王蹂躪在前朝。宋淳熙六年，李接陷州城，明嘉靖乙丑，流賊王道通大掠貴平鄉。澤中鴻雁鳴何慘，江介鯨鯢氣最驕。舊寨可堪排象陣，國朝順治十年，僞天威將軍高文貴、黃三才兵寇鬱林，列象爲陣，破水寨。新泉猶自繞龍橋。惠泉陂在茂林里伏龍橋之上。天威廣播妖氛靖，銅鼓銅船已盡銷。城西有銅鼓山，近南流江，聲聞水際。銅船乃馬援所造，後沈於河。

閒中追溯漢唐年，爲郡爲州幾革沿。山子室家長在野，陸川有山子一種，歲無定居。狙人兒女會操船。北流船皆狙人所居，名北流狙。通商那有新增課，任土還多未墾田。漫爲興除諮利病，承平作息久安然。

溫涼氣候總和平，青草黃茅瘴不生。早造新杭鸚鵡粒，仲夏刈禾，名爲早造。晚殮異味鷓鴣羹。^{〔七〕}山間多鷓鴣，作羹甚美。長教燕寢凝香篆，敢望輿人起頌聲。千騎東方吾獨後，^{〔八〕}虛稱四

十得專城〔九〕。

積雨經旬嬾出郊，居然冷署類衡茅。官除苛政如驅虎，地蓄靈湫慣起蛟。西甌池相傳有神蛟出其內。對我松筠長繞座，任他鶯燕各營巢。生平諂瀆原深戒，上下何曾有濫交。

迎春宛轉接尋春，迎春、尋春，兩橋名。羅望潞洄好問津。羅望江即西望江，源出大容，右繞州城，西流十餘里，會南流江，歷博白至廉州入海。城擁溪山堪入畫，職兼守令倍親民〔一〇〕。農家菽麥全無種，一州四邑止種稻粱。古澗魚龍絕有神〔一一〕。五龍潭、游魚洲皆昭昭有靈。待續定州風土紀，軺車

誰采好詩陳？

校勘記

〔一〕《（光緒）鬱林州志》卷二十《藝文·詩》收錄此組詩的第一、二、四、八、十首。

〔二〕『何似』，郭麐《靈芬館詩話》卷四引作『太似』。

〔三〕『烟嵐』，《（光緒）鬱林州志》卷二十《藝文·詩》引作『烟雲』。

〔四〕『蠻方』，《（光緒）鬱林州志》卷二十《藝文·詩》引作『炎方』。

〔五〕『泉瑞』，《（光緒）鬱林州志》卷二十《藝文·詩》引作『泉古』。

〔六〕『聯』，《（光緒）鬱林州志》卷二十《藝文·詩》引作『分』。

〔七〕『殮』，《（光緒）鬱林州志》卷二十《藝文·詩》引作『殮』。

〔八〕『後』，《（光緒）鬱林州志》卷二十《藝文·詩》引作『立』。

〔九〕『稱』，《（光緒）鬱林州志》卷二十《藝文·詩》引作『傳』。

〔一〇〕『守令』，《（光緒）鬱林州志》卷二十《藝文·詩》引作『守吏』。
〔一一〕『古澗』，《（光緒）鬱林州志》卷二十《藝文·詩》引作『古洞』。

交姬詩并序

同里乾章馮子曩客合浦，曾納交女孫氏蓮娘，娟麗淑慧，通習華言，兼工紉組，比諸朝雲之侍東坡。三年化去，馮子悼之。遺挂在幃，遺衣在笥，每燈炮酒闌，與客追摹往跡，洒淚盈襟。蓋姬美而賢，且得諸荒徼外域，古稱齊姜、宋子不足多矣，宜我友此情之綿綿無盡也。即席賦斷句四篇，爲姬代傳，並廣諸好事者。

訪艷殷勤萬里行，珍珠一斛換傾城。來蘇江上溶溶水，流到廉州便有情。來蘇江在口南郡。
燈前學語燕呢喃，忍赧迴身向汝南。莫怨九真風力勁，本來一現是優曇。馮君自教華語，數月後便嘸嘸可聽。

九品蓮花九級臺，六如說偈悟根荄。蠻娘死傍朝雲墓，得占中華土一堆。姬葬粵東，馮君每上冢，必慟而還。

木瓜私約宿緣多，曾聽狝獠小女歌。常熟杜君昌丁，少年從軍進藏，有狝獠小女薜茈一事，同學馬墨麟、王梅泚皆作歌紀之。番語以木瓜爲尊稱。今日黃郎倍惆悵，停尊垂淚爲宜哥。宋黃子思有《哭愛妾宜哥》詩。

登水月巖

山中淨界即檀林，水月淵源月有陰。到處總非真實相，定時長印妙明心。宰官是法皆能說，名勝如春豈易尋？記取城南新雨後，軟沙留得屐痕深。

馬伏波銅船歌

伏波征南立銅柱，四會風雲長擁護。復有銅船在尹州，淪淵入土無尋處。舊傳鬱林郡有銅船，爲漢馬援鑄造，濟海後沈於水。剡木爲舟江海通，未聞采用莊山銅^{〔一〕}。飛鳧彩鷁出爐冶，宛然十道開艨艟。想見當時臨敵砦，徵側成禽徵貳敗。班師奏凱棄船歸，後車可有明珠載。我朝威德被遐荒^{〔二〕}，大容夜遁安西王^{〔三〕}。梟殲獍殄少遺孽^{〔四〕}，八營廢壘皆農桑。國朝順治丙戌，土寇謝正奇聚黨萬人，號爲八營，參將卜雲英討平之。順治甲午，僞安西王李定國大掠鬱林，戊午，僞博寧伯馬雄部將馬堯復入寇廣西，撫臣傅宏烈克之。俱載州志。此日分符到蠻府^{〔五〕}，龍橋鳳嶺閒懷古。北流小艇挂帆行，擊汰凌波憺容與。君不見，銅船易沈銅柱折，是它是援去聲俱銷歇。惟有千年漢月留，照人旅鬢如霜雪^{〔六〕}。

校勘記

- 〔一〕『莊』，《（光緒）鬱林州志》卷二十《藝文·詩》引作『藏』。
〔二〕『我朝』，《（光緒）鬱林州志》卷二十《藝文·詩》引作『聖朝』。
〔三〕『安西王』，《（光緒）鬱林州志》卷二十《藝文·詩》引作『西安王』。
〔四〕『梟殲獍殄』，《（光緒）鬱林州志》卷二十《藝文·詩》引作『梟除殲殄』。
〔五〕『蠻府』，《（光緒）鬱林州志》卷二十《藝文·詩》引作『樂土』。
〔六〕『鬢』，《（光緒）鬱林州志》卷二十《藝文·詩》引作『髻』。

公餘以詩送日語無倫次皆同野老鳴豫也

聞喜簪花記隔晨，未優仕學濫臨民。上官特地覘施設，邊俗於今尚樸淳。八口遠從鄰郡寄，重門共見素心真。豸堂獅嶺披襟處，圓笠方筇穩稱身。

新沐彈冠浴振衣，羅羅堆案簿書稀。蠻村晴雨鳩無準，官舍孤清鶴亦饑。任事休矜當局易，省躬方覺責人非。杜陵稷卨平生志，回首何曾肯息機。

五嶺孤踪久繫匏，失時社燕未營巢。監河有粟難稱貸，尸祝無能妄代庖。率屬每於平易近，行年猶在困亨交。民懷吏畏皆浮泛，惟與溪山訂漆膠。

坎滿離虛未劑和，偶然小病異沈疴。耳鳴那復分牛蟻，齒痛何嘗廢嘯歌。仙米馨香難問種，村醪淡薄不成酲。謝公陶寫憑絲竹，哀樂中年我更多。